

民國七年續修

商水縣志

商水縣志目錄

卷一

輿圖

縣境總圖

五區分圖

三十一地方分圖

城池圖

圖

縣署圖

儒學署圖

學校圖

文廟圖

節孝祠

城隍廟圖

文昌宮圖

關岳廟圖

奎星樓圖

卷二

沿革表

卷三

職官表

知縣

教諭

訓導

典史

把總

附縣丞

主簿

縣尉

義官

儒官

農官

警佐

名宦

傳

卷四

選舉表

薦辟

進士

舉人

貢生

武科

封贈

保舉

捐職

考職

廕襲

附

雜職

學校

畢業

卷五

地理志 形勢 疆域 里地方 寨堡 集鎮 村莊 風俗 物產 古蹟

### 卷六

河渠志 河道 溝渠附 隄防 橋梁 坡湖

### 卷七

建置志 城池 公署 倉廩 養濟 漏澤附 義地 塾堡 坊表

### 卷八

田賦志 戶口 田賦 起解 存支 裁改 鹽引 雜稅

### 卷九

學校志 文廟附 名宦 鄉賢 忠義 昭忠 節孝各祠 儒學附 書院 義學 學校

### 卷十

祠廟志 壇壝 廟祀附 寺觀 冢墓

### 卷十一

麗藻志一

詔諭

對疏附

摺

卷十二

麗藻志二

公牘

卷十三

麗藻志三

書

說訓

序引

卷十四

麗藻志四

碑記

卷十五

麗藻志五

墓碑

雜記

卷十六

麗藻志六

贊

歌

詩

卷十七

人物志一 列傳

卷十八

人物志二 孝友 忠義

卷十九

人物志三 儒林 文苑 武功 方正

卷二十

人物志四 隱逸 義行 方技 流寓

卷二十一

列女志一 賢母 賢婦 節婦

卷二十二

列女志二 節婦

卷二十三

列女志三  
節婦 烈婦 孝女 貞女 烈女

卷二十四

雜事志  
祥異 兵變 補遺

卷二十五

序錄  
附 修志姓氏 刊誤表

商水縣志卷十一

麗藻志一

詔

後漢

詔

汝南太守

建和三年

置在前世求賢如渴封墓軾閭以光賢哲故公叔見誄翁歸蒙述  
解以昭忠厲俗作範後昆故光祿大夫周舉性倖魚夷忠踰隨管  
前授牧守及還納言出入京輦有欽哉之績在禁闈有密靜之風  
子錄乃勳用登九列方欲式序百官亮協三事不永夙終用乖遠  
圖朝廷愍悼良爲愴然詩不云乎肇敏戎功用錫爾祉其合將大  
夫以下到喪發日復會弔加賜錢十萬以旌委蛇素絲之節焉後漢

書周舉傳

對疏 附摺

後漢

河南三輔大旱

陽嘉三年

周舉 邑人

臣聞易稱天尊地卑乾坤定矣二儀交媾乃生萬物萬物之中以人爲貴故聖人養之以君成之以化順四時之宜適陰陽之和使男女婚娶不過其時包之以恩導之以德教示之以災異訓之以嘉祥此先聖承乾養物之始也夫陰陽閉隔則二氣否塞二氣否塞則人物不昌人物不昌則風雨不時風雨不時則水害成災陛下處唐虞之位未行堯舜之政近廢文帝光武之法而循亡秦奢侈之欲內積怨女外有曠夫今皇嗣不興東宮未立傷和逆理斷絕人倫之所致也非但陛下行此而已豎宦之人亦復虛以形勢威侮良家取女閉之至有白首歿無配偶逆於天心昔武王入殷



出傾宮之女成湯遭災以六事尅己魯僖遇旱而自責祈雨皆以  
精誠轉禍爲福自枯旱以來彌歷年歲未聞陛下改過之效徒勞  
至尊暴露風塵誠無益也又下州郡祈神致請昔齊有大旱景公  
欲祀河伯晏子諫曰不可夫河伯以水爲城國魚鱉爲民庶水盡  
魚枯豈不欲雨自是不能致也陛下所行但務其華不循其實猶  
緣木求魚卻行求前誠宜推信革政崇道變惑出後宮不御之女  
理天下冤枉之獄除大官重膳之費夫五品不訓責在司徒有非  
其位宜急黜斥臣自藩外擢典納言學薄智淺不足以對易傳曰  
陽感天不旋日惟陛下留神裁察

後漢書  
本傳

清

請爲署陳州府通判王可思建專祠摺

咸豐  
九年

河南恒  
巡撫

再上年冬間皖捻竄撲周家口地方署陳州府通判候補同知王可思督勇禦賊先將該匪擊退嗣因衆寡不敵被匪撲入衙內該員王可思不知下落經臣飭委候補知府傅壽彤前往確查辦理奏明在案茲據該府傅壽彤會同陳州府知府安奎稟稱該府等前赴周家口確查王可思屍身下落據該處鄉民僉稱賊中逃民俱親見該署通判帶勇接仗殺賊多名嗣勇圍潰散王可思退回衙署被賊擁進署內將其架至署門首殺害屍身撩入火內燒燬等語當即飭傳該難民沈廷棟等到案查詢核與各鄉民所稱情形相同是該員王可思遇賊接仗力竭被害屍身被賊撩入火中燒燬無存已屬可信又查得王可思之子王樾禦賊被傷投河身死其媳馬氏被執義不受辱爲賊殺害僕人周成懷抱王可思孫女升官出署被賊擁擠落河溺斃車夫劉義皂役韓洪義張先軍

牢王子敬亦同時被害各死尸均已我獲查驗相符分別殮埋等  
稟經軍需局司道查王可思當擒匪將竄周家口之時書役人等  
勸其避去該員曾云爲官不離衙署當以一死報迨該員與匪接  
仗勇圍潰散之後退回署內堅守不去被賊擁署內將其架出殺  
害致命遂志實與其生前之語相符其爲被賊戕害屍身等情由  
軍需局司道詳請具奏前來臣查該署通判王可思打仗殺賊力  
竭被害洵屬大節凜然深堪憫惻至其子媳人等同時殉難亦屬  
節義無虧相應請旨敕部將署陳州府通判候補同知王可思照  
陣亡例從優議卹並請於周家口地方建立專祠以慰忠魂並將  
該員之子王樾媳馬氏孫女升官及僕人周成車夫劉義皂役韓  
洪義張先軍牢王子敬一併分別議卹祀祀俾昭激勸理合附片

具奏查

約陳時弊疏

宣統元年

監察御史李擢英

邑人

奏爲約陳時弊敬竭愚誠以保國粹而饜人心恭摺仰祈聖鑒事  
竊維治無論古與今總以義爲目的學不分新與舊要以理爲範  
圍邇來言政治道文學者迥異昔時往往棄成法如弁髦奉列強  
爲圭臬豈知殊方異俗取貌遺神揆之義理每多刺謬有適爲中  
國所詬病反爲外人所竊笑者請爲我皇上約言之一行政宜存  
大體也管仲霸佐猶云禮義廉恥國之四維四維不張立見消亡  
蓋言非此無以爲國也中國聚賭窩娼向干例禁今則各省彩票  
爭相效尤甚至派及地方責成州縣名爲籌款辦公實則罔民取  
利是民不賭而官率之子弟不賭而父兄誘脅之並以術得之孟子  
云上下交征利殆類是此其失大體者一也盛世無聚歛之臣  
今乃房捐舖捐糞捐車捐收括無遺所最不堪者妓捐一項亦接

月抽收每家若干每人若干皆有定數莠民恣肆遂儼然開張書其班曰清吟美其名曰報効國家生財有道何致使若輩失身集款况莫非赤子拯救之不暇安有因以爲利之理臣前爲巡城御史禁娼絕迹而今無忌憚矣此失大體者二也女學堂及女傳習所女子實踐所殊不可解閨闈之中詎不可讀書習藝而乃朝暮風雨獨往獨來所學語言文字既無交涉可辦又無出使可言費神勞力實覺無謂又如短衣體操沿街演隊男女無別流弊更不可勝言費神勞力此失大體者三也卽此三者禮義廉恥掃地盡矣敢祈皇上飭令停辦以存國體以維士風則天下心悅誠服矣一辦事宜責實效也近來朝廷孜孜求治臣下所請率多准行於是好事者概從變計謬說改良隱便圖私顯言公益用欲省而多添局所事不殊而另設科目猶是軍旅之事而巡警探訪洋操洋

裝何與勝負之算猶是刑名之事而檢察審判各區各廳徒多等級之分推而言之錢穀則銅元銀幣一國且未暢行也工藝則製造紡紗數年尙未就緒也是故多立章程不如認真辦理鋪張表式未必切實遵行擾攘紛紜上下交困乃附和者動曰成效卓著不知成效果安在也敢祈皇上循名核實勿任以欺飾塞責則事有起色矣一用人宜黜浮華也唐宋以來皆設科目高宗純皇帝諭云取士之法不過如此其賢否在乎歷試煌煌聖訓誠用人不易之理也今則共尙專門別開捷徑學堂有定額實不足以廣陶成學生講平權更何足以興仁讓況乎但求畢業即予出身足一駐東洋便得官爲翰林主事身或通西學即專闢爲統制鎮軍人存僥倖之心士長囂凌之習將來以此筮仕臨民竊恐有難焉者若夫京外各衙門調用人員不次超升此等情弊多由奔競已

在聖明洞鑒之中前日上諭共當悚惶無須臣贅言也敢祈皇上  
昌明正學澄敘官方則士氣伸而節義生矣一理財宜節糜費也  
伏讀正月十七日諭旨有冒濫虛糜實爲惡習著切實裁汰並官  
員薪費核實釐定等語仰見朝廷節用愛人必均必平莫名欽佩  
而臣尤有言竊見近年來舉動不免虛糜官則裁者少而加者多  
工則停者寡而興者衆任事何關房屋而務極輝煌爲官豈計俸  
薪而必求豐厚耶如新添各衙門各廳各局每以洋法講聲光修  
而拆拆而修至數次不已何怪乎一處須數萬十數萬陸軍部竟  
多至三十餘萬也至於常年經費更屬不貲尙書俸纔三百金乃  
外務部郎中章京一月三百抵尙書十二月九卿俸約二百兩乃  
郵傳部丞參行走一年四千勝九卿二十年此外惟農商部民政  
部近似其餘皆相去遠矣莫非王臣莫非王事何苦樂懸殊之甚

也他如歲歲大操動逾百萬人人游歷何補一毫虛糜多端未易悉數外省揣摩風氣張大其詞請領部款糜費亦可想見敢祈皇上嚴杜漏卮明定限制則帑項裕而穀祿平矣臣極慕文明未窺宗旨謹就平日見聞所及不避嫌怨披瀝上陳是否有當伏乞皇上聖鑒訓示謹奏

河南地丁雜稅徵收無定疏

李擢英

奏爲河南地丁雜稅徵收無定請旨飭令明予限制並酌量歸公以敷攤款而免擾民恭摺仰祈聖鑒事竊聞本年三月戶部籌款一摺以借用英法俄德諸國息銀爲數甚鉅令各省關及各省督撫於地丁茶課鹽課雜稅項下按年指撥事關邦交誠今日之要務也其指明地丁等項者恐此外零星無濟且擾民也臣夙懷愚悃愧乏良謨於他省未能周知謹就臣籍河南情形爲我皇上詳



陳之一河南地丁自賈漢復清理田賦謂州縣多征核與科則不符爲之更正今則積弊愈深矣其征銀之處每兩猶止征一兩五六錢至征錢之處則每兩征制錢二串七百文至三串餘不等合銀二兩有奇又州縣但圖早解往往以糧票付吏役而使之墊繳吏役取償於民百方需索更不能以數計是故追呼已迫敲比猶頻稱貸窮逋逃遂衆此地丁過重之情形也一河南雜稅額徵八萬餘兩係指牙帖老稅而言其置買田房活稅戶例載明每價銀一兩稅銀三分又云儘收儘解誠以此項多而無定不可以額限也乃近來州縣批解皆如額而止餘則盡歸私囊矣夫州縣大小不同而額徵均在一千內外臣見聞所及確知州縣收稅多係責成里書及稅房書吏限以成數俾按年按月呈繳若干大約大縣不下萬兩小縣亦數千兩如陳州所屬皆是蓋徵收雜稅未有